

Victor Berther-Berther, Rueras

FB Igl ei buca ina caussa da mintga di, ch'ins pren enconuschientscha d'in carstgaun quasi avon ch'ins hagi saviu ch'el seigi nasschius. Denton en la veta eis ei in esser ed in vegnir e l'ura dalla mort ei cumiau per adina.

Quei cass ei succedius lezza gada ils 5 d'october 1915 cu nus raccoltavan ils truffels sin Crestas sur il vitg da Rueras. Tuttenina ha il zenn da mort annunziav lamentond la prematura mort dalla mumma Onna Maria Berther-Caduff. Ei era la mumma digl affon Victor Berther, dil qual nus seregurdein ussa da sia veta e da sia demananza cun quellas lingias.

Affonza

Victor Berther ei nasschius a Rueras sco pli giuven dils quater affons da Gion Battista Berther ed Onna Maria Caduff. Sco gia indicau ei sia mumma morta cuort suenter la nasschientscha da siu fegl. Bein ina greva frida per bab ed affons. Mai ha il Victor viu ina eglia da dalla mumma, mai saviu clamar l'atgna mumma e mai guder carezia materna. In frar dalla mumma, igl aug Lurenz e sia dunna Culastia, han empruau da remplazzar al Victor quella largia ed aschia ei la carezia semanifestada per igl affon pign. Els havevan giu avon zacons onns in affon ch'ei denton morts gia da baret. Els han surpriu la tgira e quitau e l'entira educaziun per il Victor e lez ha giu la cuida d'esser staus en buns mauns.

Siu aug fuva bein in dils pli distingui vischins da lez temps e sia consorta Culastia ina femna buntadeivla e sempla. Il Victor ei denton buca mo vegnius puppergnaus. Ei han sedau breigia en tutta carezia da far ord igl affon in carstgaun endretg. Daveras ei il Victor staus in affon allert e spir veta e segir vegn el a haver dau agl aug ed all'onda beinenqual legn e dafar. Igl ei era buca tuttina sche affons han fargliuns ni auters affons da siu per dentuorn. Era per in affon aschia vala il plaid: igl ei buca bien d'esser persuls. Mo la pazienza, la bunaveglia e la carezia da ses geniturs nutriders ein stai la segira caparra per ina buna educaziun e per la futura veta da quei carstgaun. Da quellas bunas ovras meretan in monument, silmeins in monument da regurdientscha ed engrazieivladad.

Emprendissadi e mistregn

Ed engrazieivels ei il Victor staus. Contas gadas ha el raquintau dalla reacziun digl aug fravi cura ch'el havevi sco buob adina mo el tgau da vegnir in grond catschadur. Cheu hagi quel detg: «Gronds sas te vegni, aber gl'emprem empren da fravi, api lein nus lu mira!» E sin quei ha el entschiet siu mistregn da fravi tier siu aug e bab nutrider. Quel fuva in fravi renconuschiu lunsch entuorn. A mi ha il Victor giu raquintau: «Sch'igl aug vess betga stuschau me, vess ju mai empriu quai mistregn. 'Fravi

nair' schevan ei da lez ad ussa dian ai quai da me». Ins sa dir ch'igl aug ha cussegliav bein siu nevs. El ha empriu, ei sescolaus e ha ughegiau; el ha baghegiav per saver survir endretg sia clientella. E siu mistregn ha era teniu si da tgau el e sia famiglia. Dasperas ha el onns ora fatg il pur da cauras e nuorsas e luvrau il pign fatg puril sez. Quei ei bein era stau in agid per pli tard, ed in plaz per endisar e metter vid la lavur ils agens affons.

Famiglia

Igl onn 1933 miera sia buna onda Culastia. Igl aug ed il Victor fan pli che tshun onns sez il percasa ni mintgaton cun agid da parents. 1938 miera igl aug, ussa fuva il Victor persuls, haveva denton casa, fatschenta e mistregn. Per temps eis el semess ensemen cun siu bab e ses treis fargliuns. Igl onn 1945 ha el spusau la Sofia Berther da Dieni. Cun ella ha el tratg si nov affons, treis feglias e sis fegls. Per sia famiglia ha el veramein fatg tut tgei ch'el ha saviu. Il Victor era sco jeu sai in ualti serius bab, in che veva uorden e leva uorden. Bein-duras quasi empau strebels, mo oz semuossa ei ch'igl ei vegniu ora detg pulit. Autoritad ei savens dira e ruha, mo il fretg da quella ei il mussament ch'ella va darar a piarder.

Victor il vischin

Nus fuvan quasi 10 onns in ord l'auter en la vegliadetgna. Vivs, allerts e spir ideas sco el era, fageva el gia bien e baul sevaler en radunonzas. El scriveva sco in advocat, veva senn e sentiment



per nossas isonzas e nossa cultura e fageva paleis siu meini senza retenientschas, era sche auters fuvan buca dil medem meini. Aschia eis ei stau evident ch'el ha stuiu surprendre differents uffecis publics. Biaras gadas da quels ch'eran buca fetg tschercai, era buca tschercai dad el sez. Aschia eis el staus gl'emprem president dil cussegl da scola, suenter che negins spirituals han sehannau pli da quei uffeci. Era duront ses onns sco gerau en suprastonza ha el agiu

endretg. Savens, per dir aschia, senza s'enclinar. El era «halt il Victor»; enconuschents per siu plaid agradora, seigi quel beinvegnius ni buca. En tut e daptut han ins renconuschiu sia bunaveglia da far siu duer. Bein era el in carstgaun impulsiv, che fageva smanis ed alzava la vusch, perfin tier il dar troccas. In che enconuscheva buca el havess saviu tertgar ch'el seigi in nausch. Denton quei era el buca, quei era siu esser, sia natira e cun quei ha el stuiu far sia veta, empalada d'in spert spontan.

Plinensi hai menziunau ch'el scriveva sc'in advocat. Denton el legeva era bia ed empruava dil tut. Tgisà, forse san sias notizias e ses referats ch'ei avon maun vegnir dretg ad enzatgi. Sia famiglia, sia fatschenta e beinenqual ovra da fravi dattan vinavon perdetga da siu viver e da sia activitad.

Sera dalla veta

Ils davos onns eis ei vegniu quiet entuorn el. El ha entschiet ad emblidar ed ira en fanzegna e vegnius amauns dalla paupradad dalla vegliadetgna. Duman-dav'ins el zatgei, schev'el per ordinari cun buca rienta: «Ju sa nueta ple, ju emblida tut.» Per nus quasi enzatgei nuncapeivel. En sia miseria e vegliadetgna ein ses affons e surtut sia dunna Sofia stai il davos confiart. Nunpudend la Sofia pli, ein els serendi en la casa sogn Vigeli a Sedrun, nua ch'el ha dau sia davosa fladada ils 26 da matg. Il Segner vegli remunerar la Sofia per sia tgira e carezia e per tut il bien ch'el ha retschiert da concarstgauns en sia veta. Al preziau defunct giavischein nus la pasch enten il Segner.



Victor Berther-Berther Rueras

Gest cu fineschel miu scriver per il defunct Vigeli Caduff, annunzia il zenn grond da s. Giachen la mort dil Victor Berther.

Victor Berther ei naschius ils 29 da settember 1915 a Rueras. Ses geniturs ein stai il Gion Battesta da Camischolas ed Onna Maria Caduff da Rueras. Quella famiglia ha giu 4 affons, dals quals il Victor ei staus il giuven. Siat dis suenter sia naschienscha ha la mort priu naven dil pign affon, ses fargliuns ed

il bab, sia buna mumma. Bein ina gronda disgrazia per tuts. Mai ha il Victir udiu in sun ord las levzas maternas, mai ha el saviu inagada clamar la mumma. Denton ha la veta era stuiu ir vinavon per il Victor. Ina buna onda e siu aug Giachen Lurenz han, havend negins agens affons, priu il Victor sco agen. Els han educau e giu bien quitau per el. Cheu ha el gudiu sia affonza, fatg siu emprendissadi, sescolaus e cu el ei staus carschius era giu bien sentiment ed engraziament per tut bien retschiert.

Igl onn 1933 ei sia onda morta e 1938 era igl aug. Suenter la mort digl aug eis el semess en cun il bab e ses 3 fargliuns entochen igl onn 1945 nua che siu bab ei morts. Il medem onn eis el sespusaus cun la giuvna Sofia Berther da Dieni. Els dus han giu la ventira d'ina famiglia da 9 affons. Per quella ha el luvrau e spargnau e staus in serius bab cun senn da responsabladad per ils ses.

Da giuven fuva el in viv ed allert che vegn inaga ni l'otra ad haver dau da lignar a ses geniturs nutriders. Ord dad el eis ei denton dau in um savieivel, in che teneva buca anavos cun siu meini, denton faulsadad enconuscheva el buca.

Als davos onns ha sia sanadad dau debia festedis. Tgi vess detg che quei um spir veta e spontanadad vegness en ses vegls dis sco in affon. Cun carezia e premura han sia consorta e ses affons giu quitau dad el entochen siu davos suspir. Dieus remunereschi tuts.

Als 26 da matg 1994 eis el morts ella casa s. Vigeli a Sedrun.

Ti Victor ruaussa en la pasch dil Segner.

Lein seregurdar en pietad da nos morts.